

南海寄歸內法傳

卷三
之四

南海寄歸內法傳卷第三

唐翻經三藏沙門義淨撰

十九受戒軌則

西國出家軌儀咸悉具有聖制廣如百一羯磨此但略指方隅諸有發心欲出家者隨情所樂到一師邊陳其本意師乃方便問其難事謂非害父母等難事既無許言攝受既攝受已或經旬月令其解息師乃爲授五種學處名卽波索迦自此之前非七眾數此是創入佛法之基也師次爲辦縵條僧腳崎及下裙等并鉢瀝羅方爲白僧陳出家事僧眾許已爲請阿

遮利耶可於屏處令剃頭人爲除鬚髮方適寒溫教其洗浴師乃爲著下裙方便檢察非黃門等次與上衣令頂戴受著法衣已授與鉢器是名出家次於本師前阿遮利耶授十學處或時闇誦或可讀文既受戒已名室羅末尼羅

譯爲求寂言欲求趣涅槃圓寂

之處舊云沙彌者言略而音訛翻作息慈意准而無據也威儀節度請教白事與進具者體無二准但於

律藏十二無犯其正學女片有差降十二者何一不

分別衣二離衣宿三觸火四足食五害生種六青草

上棄不淨七輒上高樹八觸寶九食殘宿食十壞地

十一不受食。十二損生苗。斯之十二兩小非過。其正學女後五便犯。此下三眾咸制安居。其六法六隨法。如餘處說。能如是者。方成應法。是五眾收堪銷物利。豈有既出家後。師主不授十戒。恐其毀破大戒不成。此則妄負求寂之名。虛抱出家之稱。似懷片利。寧知大損經云。雖未受十戒。墮僧數者。乃是權開一席。豈得執作長時。又神州出家。皆由公度。既蒙落髮。遂乃權依一師。師主本不問其一遮。弟子亦何曾請其十戒。未進具來。恣情造罪。至受具日。令入道場。律儀曾不預教。臨時詎肯調順。住持之道。固不然矣。既不合

消常住。受施負債何疑。理應依教而爲濟脫。凡蒙公
度者皆須預請一師。師乃先問難事。若清淨者爲受
五戒。後觀落髮授縵條衣。令受十戒。法式旣閑。年歲
又滿。欲受具戒。師乃觀其意志。能奉持者卽可爲辦
六物。并爲請餘九人。或入小壇。或居大界。或自然界。
俱得秉法。然壇場之內。或用眾家褥席。或可人人自
將坐物。略辦香華。不在營費。其受戒者。教令三遍。一
一禮僧。或時近前。兩手執足。此二皆是聖教禮敬之
儀。亦旣禮已。教其乞戒。旣三乞已。本師對眾爲受衣
鉢。其鉢須持以巡行。普呈大眾。如合樣者。大眾人人

咸云好鉢。如不言者。招越法罪。然後依法爲受。其羯磨師執文而讀。或時暗誦。俱是聖教。旣受戒。已名鄔波三鉢那。鄔波是近。三鉢那是圓。謂涅槃也。今受大

戒。卽是親近涅槃。舊云具足者言其汎意。然羯磨一

竟。急須量影記五時之別。其量影法。預取一木條如細箸許。可長一肘。折其一頭。四指令豎如曲尺形。勿使相離。豎著日中。餘杖布地。令其豎影與臥杖相當。方以四指量其臥影。滿一四指名。一布路沙。乃至多布路沙。或一布路沙。餘一指半指。或但有一指等。如是加減。可以意測。言布路沙者。譯爲人也。所以四指

之影名一人者。卽是四指豎杖影長四指之時。此人
立。在日中影量與身量相似。其八指遂與身量兩影
相似。斯據中人未必皆爾。自餘長短義可准之。然須
道其食前食後。若天陰及夜。卽須准酌而言之。若依
神州法者。或可豎尺日中量影長短。或復記其十二
辰數。言五時者。旣而方域異儀。月數離合。自非指事
難以委知。一謂冬時有四月。從九月十六日至正月
十五日。二謂春時亦有四月。從正月十六日至五月
十五日。三謂雨時但有一月。從五月十六日至六月
十五日。四謂終時唯一日一夜。謂六月十六日晝夜。

五是長時。從六月十七日至九月十五日。此乃獨於律教中佛制如是次第。明有密意也。若依方俗。或作三時四時六時。如餘處說。凡西方南海出家之人。創相見者。問云大德幾夏。答云爾許。若同夏者。問在何時。若時同者。問得幾日。若日同者。問食前後。同在食前方。問其影。影若有殊。大小成異。影若同者。便無大小。坐次則據其先至。知事乃任彼前。差向西方者。必須問此。不同支那。記其月日而已。然那爛陀寺多是長時。明相纔出。受其近圓意。取同夏之中。多爲最大。卽當神州六月十七日。明相纔出。由不得後夏故。此

據西方坐夏之法。若如神州舊行。卽當五月十七日也。若六月十六日夜將盡而受戒者。則同夏之中最小。由其得後夏故。旣受戒已不待臘施。若其師有爲辦少多。或持腰條。或濾水羅等。奉臨壇者。以表不空之心。次卽本師爲指戒本。令識罪相。方教誦戒。旣其熟已。誦大律藏。日日誦過旦旦試之。不恆受持。恐損心力。誦律藏了。方學經論。此是西方師資途轍。雖復去聖懸遠。然而此法未虧。爲此二師喻之。父母豈有欲受之時。非常勞倦。亦旣得已。戒不關懷。有始無終。可惜之甚。自有一會求受。受已不重參師。不誦戒經。

不披律典。虛霑法伍。自損損他。若此之流。成滅法者。

然西方行法。受近圓已。去名鐸曷擢。譯爲小師。滿十

夏名悉他薛擢。譯爲住位。得離依止而住。又得爲鄔

波駄耶。凡有書疏。往還題云。求寂某乙。小苾芻某乙。

住位苾芻某乙。若學通內外德行高著者。便云多聞

苾芻某乙。不可方僧某乙。僧是僧伽目乎。大眾寧容

一已。輒道四人。西方無此法也。凡爲親教師者。要須

住位。滿足十夏。秉羯磨師及屏教者。并餘證人。並無

定年幾事。須解律清淨。中邊數滿。律云。非鄔波駄耶。

而喚爲鄔波駄耶。非阿遮利耶。喚爲阿遮利耶。或翻

此二及親斥鄔波駄耶名者皆得惡作之罪。若有人問云爾親教師其名何也。或問汝誰弟子。或可自有事至須說師名者。皆應言我因事至說鄔波駄耶名。鄔波駄耶名某甲。西國南海稱我不是慢詞。設令道汝亦非輕稱。但欲別其彼此。全無倨傲之心。不並神州將爲鄙惡。若其嫌者改我爲今斯。乃咸是聖教。宜可行之。不得雷同。無分皂白云爾。凡諸白衣詣苾芻所。若專誦佛典。情希落髮。畢願緇衣。號爲童子。或求外典。無心出離。名曰學生。斯之二流。並須自食。西國僧寺多有學生。來就苾芻習學外典。一得驅馳給侍。

二乃教發好心。既有自利利他畜之非損。必是杜多
一鉢理則不勞。若也片有供承。亦成是娶。遣給齒木
令其授食。足應時須。不傷悲道也。若餐常住聖教。全
遮必其於眾有勞。准功亦合餐食。或是普通之食。或
可施主先心。雖復噉食。故成無罪。夫龍河影沒。鷲嶺
光收。傳法羅漢。能餘幾在。故論云。大師眼閉。證者隨
亡。煩惱增時。應勤莫逸。理當諸德共作護持。若委隨
而縱慢心。欲遣人天何所歸向。律云。有秉羯磨。我法
未滅。若不秉時。我法便盡。又曰。戒住我住。理非虛說。
既有深旨。誠可敬歟。重曰。

大師影謝法將隨亡。邪山峻峙。慧巘隕綱。重明佛
日。寔委賢良。若遵小徑。誰弘大方。幸惟通哲。勉力
宣揚。冀紹隆之無替。傳永劫而彌芳。彌芳伊何。戒
海揚波。此則教將滅而不滅。行欲訛而不訛。符正
說於王舍。事無虧於逝多。

二十洗浴隨時

夫論洗浴之法。西國乃與東夏不同。但以時節調和
稍異。餘處於十二月。華果恆有不識。冰雪薄有微霜。
雖復多暑。亦非苦熱。熱則身無痲子。寒乃足無皴裂。
爲此人多洗沐。體尙清淨。每於日日之中。不洗不食。

又復所在之處極饒池水時人皆以穿池爲福若行一驛則望見三二十所或寬一畝五畝於其四邊種多羅樹高四五十尺池乃皆承雨水湛若清江八制底處皆有世尊洗浴之池其水清美異於餘者那爛陀寺有十餘所大池每至晨時寺鳴健稚令僧徒洗浴人皆自持浴裙或千或百俱出寺外散向諸池各爲澡浴其浴裙法以疊布長五肘闊肘半繞身使巾抽出舊裙迴兩頭令向前取左邊上角以右手牽向腰下令使近身併蹙右邊摩入腰內此謂著浴裙法臥時著裙其法亦爾欲出池時抖擻徐出勿令蟲著

上岸法式廣如律辯。若不向池寺中洗者。著裙同此。水遣人澆。隨處隨時可爲障蔽。世尊敎爲浴室。或作露地。甄池。或作去病藥湯。或令油遍塗體。夜夜油恆揩足。朝朝頭上塗油。明目去風。深爲利益。皆有聖敎。不遑具述。廣如律也。又洗浴者。並須饑時。浴已。方食。有其二益。一則身體清虛。無諸垢穢。二則痰癰消散。能餐飲食飽。方洗浴。醫明所諱。故知飢沐飽浴之言。未是通方之論。若著三尺浴衣。褊小形露。或元不著赤體而浴者。深乖敎理也。應用四幅洗裙遮身可愛。非直奉遵聖敎。亦乃不愧人神。餘之可不智者當悉。

夜浴尙不改容。對人寧無掩蔽耳。

二十一坐具襯身

禮拜敷其坐具。五天所不見行。致敬起爲三禮。四部罔窺其事。凡爲禮者。拜數法式。如別章所陳。其坐具法。割截爲之。必須複作。制令安葉。度量不暇詳悉。其所須者。但擬眠臥之時。護他氈席。若用他物。新故並須安替。如其已物。故則不須。勿令污染。虧損信施。非爲禮拜。南海諸僧人持一布長三五尺。疊若食巾。禮拜用替膝頭。行時搭在肩上。西國苾芻來見。咸皆莞爾而笑也。

二十二臥息方法

西國房迮居人復多臥起之後牀皆舉擣或內置一邊或移安戶外牀闊二肘長四肘半褥席同然輕而不重然後牛糞乾揩其地令使清淨安置坐牀及木枯小席等隨尊卑而坐如常作業所有資生之具並棚上安之其牀前並無以衣遮障之法其不合者自不合臥如其合者何事遮身其眾僧臥具必須安儼方合受用坐具意在於此如其不爾還招黑背之辜聖有誠言不可不慎又復南海十島西國五天並皆不用木枕支頭神州獨有斯事其西方枕囊樣式其